



Broj: 07-11-625/21
Vogošća, 28.05.2021. godine

Na osnovu člana 69. stav 2. tačka tačka e) Zakona o javnim nabavkama BiH ("Službeni glasnik BiH" broj: 39/14) i čl. 71. i 125. Statuta Općine Vogošća ("Službene novine Kantona Sarajevo", broj 27/14 i 14/15 Prečišćeni tekst), Općinski načelnik dana 28.05.2021. godine donio je

**ODLUKU
O PONIŠTENJU OTVORENOG POSTUPKA NABAVKE RADOVA NA IZGRADNJI
DISTRIBUTIVNE GASNE MREŽE NA PODRUČJU MZ VOGOŠĆA I, U ULICAMA
KRIVOGLAVCI I I II (III FAZA), NA PODRUČJU OPĆINE VOGOŠĆA**

Član 1.

Poništava se Otvoreni postupak nabavke radova na izgradnji distributivne gasne mreže na području MZ Vogošća I, u ulicama Krivoglavci I i II (III faza), na području općine Vogošća broj: 07-11-625/21, jer je cijena jedine formalno-pravno prihvatljive ponude ponuđača "Špic beton" d.o.o. Zenica veća od osiguranih sredstava za predmetnu nabavku, a u skladu sa članom 69. stav 2. tačka e) Zakona o javnim nabavkama BiH ("Službeni glasnik BiH" broj: 39/14).

Član 2.

Ova Odluka stupa na snagu danom donošenja, a objaviće se na web stranici Općine Vogošća, istovremeno s upućivanjem ponuđačima koji su učestvovali u postupku javne nabavke, u skladu sa članom 70. stav 6. Zakona o javnim nabavkama BiH.

OBRAZLOŽENJE

Općinski načelnik je dana 28.04.2021. godine donio Odluku o pokretanju Otvorenog postupka nabavke radova na izgradnji distributivne gasne mreže na području MZ Vogošća I, u ulicama Krivoglavci I i II (III faza), na području općine Vogošća zajedno sa objavljivanjem Obavještenja o nabavci i tenderske dokumentacije na Portalu javnih nabavki BiH dana 28.04.2021. godine pod brojem: 1353-1-3-60-3-58/21.

Sažetak Obavještenja o nabavci objavljen je u "Službenom glasniku BiH" broj: 27/21 od 30.04.2021. godine.

Tendersku dokumentaciju sa Portala javnih nabavki BiH je preuzelo 13 (trinaest) ponuđača. Krajnji rok za dostavu ponuda bio je 20.05.2021. godine do 12:00 sati, te je izvršeno javno otvaranje ponuda, što je konstatovano Zapisnikom sa otvaranja ponuda od 20.05.2021. godine.

Nakon izvršenog otvaranja ponuda, Komisija za javne nabavke je pristupila analizi dokumentacije priložene uz ponude, u smislu provjere njihove validnosti, s obzirom na iskazane zahtjeve ugovornog organa u Tenderskoj dokumentaciji broj: 07-11-625/21 iz aprila 2021. godine, odnosno pregledu ponuda u skladu sa procedurama i pravilima utvrđenim Tenderskom dokumentacijom, te Zakonom o javnim nabavkama BiH i pripadajućim podzakonskim aktima.

Shodno navedenom Zapisniku sa otvaranja ponuda, Komisija za javne nabavke je konstatovala da su zaprimljene 3 (tri) ponude i to:

R.B.	NAZIV PONUĐAČA/GRUPE PONUĐAČA	UKUPNA CIJENA (KM) bez PDV-a	POPUST	CIJENA (KM)SA POPUSTOM bez PDV-a	UKUPNA CIJENA (KM) sa PDV-om
1	"Musić company" d.o.o. Hadžići	59.754,65	/	/	69.912,94
2	"Špic beton" d.o.o. Zenica	58.542,00	/	/	68.494,14
3	"Hik-net" d.o.o. Sarajevo	50.995,24	/	/	59.664,43

Uvidom u priloženu dokumentaciju i suštinskom provjerom sadržaja i validnosti iste, Komisija za javne nabavke je utvrdila sljedeće:

- I. Ponuda ponuđača "Musić company" d.o.o. Hadžići ne ispunjava formalno-pravne uslove tražene Tenderskom dokumentacijom i to:
 - Tačkom 7.2.1.TD, a u skladu sa članom 46. Zakona traženo je da ponuđači moraju biti registrovani za obavljanje djelatnosti koja je predmet javne nabavke. U svrhu dokazivanja profesionalne sposobnosti ponuđači su bili dužni u ponudi dostaviti dokaz o registraciji u odgovarajućem profesionalnom ili drugom registru u zemlji u kojoj su registrovani ili da obezbjede posebnu izjavu ili potvrdu nadležnog organa kojom se dokazuje njihovo pravo da obavljaju profesionalnu djelatnost, koja je u vezi sa predmetom nabavke, uz napomenu da dokazi koji se dostavljaju moraju biti originali ili ovjerene kopije.

Ponuđač "Musić company" d.o.o. Hadžići je u svojoj Ponudi kao dokaz za obavljanje profesionalne djelatnosti dostavio ovjerenu kopiju Aktuelnog izvoda iz sudskog registra od 19.03.2021. godine.

Komisija za javne nabavke smatra da dostavljena ovjerena kopija Aktuelnog izvoda iz sudskog registra nije ovjerena od strane nadležnog organa na ispravan način. Naime, ovjerena je samo zadnja strana Izvoda, a obzirom da se isti sastoji od više stranica, bilo je potrebno ovjeriti svaku stranicu Izvoda pojedinačno-između stranica, a prema zvaničnom mišljenju datom u Rješenju Ureda za razmatranje žalbi BiH-Podružnica Mostar broj: JN2-03-07-1-729-8/17 od 24.08.2017. godine.

Također, Komisija za javne nabavke smatra problematičnim činjenicu da se priloženi Aktuelni izvod iz sudskog registra sastoji od 3 (tri) stranice, dok je Služba za opću upravu, društvene djelatnosti i zajedničke poslove Općine Hadžići ovjeravajući predmetnu kopiju dokumenta na pečatu na strani 11. Ponude naznačila da se isti sastoji od 1 (jedne) stranice, što je direktno utjecalo na formalno-pravnu ispravnost dostavljenog dokumenta.

- Tačkom 7.4.1. pod b) TD a u skladu sa članom 51. Zakona tražena je obrazovna i profesionalna kvalifikacija lica koja su angažovana na izvođenju konkretnih radova i to da ponuđač između ostalog ima na raspolaganju i 1 (jedno) lice, SSS ili VŠS saobraćajne struke-III ili V stepen, smjer rukovalac građevinskim mašinama (KV ili VKV rukovaoc građevinskim mašinama).

Tačkom 7.4.2. pod b) TD je pored ostalih zahtjeva traženo da se kao dokazi za 1 (jedno) lice, SSS ili VŠS saobraćajne struke-III ili V stepen, smjer rukovalac građevinskim mašinama (KV ili VKV rukovaoc građevinskim mašinama) dostave Diploma/Svjedočanstvo o završenoj traženoj stručnoj spremi i dokaz o radnom angažmanu, uz napomenu da dokazi koji se dostavljaju moraju biti originali ili ovjerene kopije.

Ponuđač "Musić company" d.o.o. Hadžići je u svojoj Ponudi (strana 30. Ponude) kao dokaz za traženo dostavio Uvjerenje o osposobljenosti za rukovanje građevinskim mašinama broj: 2048-09/20 od 07.09.2020. godine, izdato od "Protect-ing" d.o.o. Sarajevo, kojim se dokazuje da je Semir Musić osposobljen za rukovanje građevinskim mašinama.

Uvažavajući dostavljeno, Komisija za javne nabavke cijeni da je ponuđač "Musić company" d.o.o. Hadžići dostavljanjem prethodno pomenutog Uvjerenja o osposobljenosti propustio da dostavi dokaz tražen tačkom 7.4.2. pod b) TD, a kojom je kao dokaz jasno zahtjevana Diploma/Svjedočanstvo o završenoj traženoj stručnoj spremi i dokaz o radnom angažmanu.

- Tačkom 7.4.1. pod c) TD, a u skladu sa članom 51. Zakona je traženo da ponuđač posjeduje/ima na raspolaganju građevinske mašine i tehničku opremu neophodnu za uspješno izvođenje predmetnih radova i između ostalog da ima na raspolaganju 1 (jedan) valjak ukupne mase do 3 t.

Tačkom 7.4.2. pod c) TD je između ostalog traženo da se kao dokaz za traženi valjak ukupne mase do 3 t iz tačke 7.4.1. pod c) stavka 5. treba kao dokaz dostaviti važeća saobraćajna dozvola/potvrda o registraciji ili važeća upotrebna dozvola.

Ponuđač "Musić company" d.o.o. Hadžići je u svojoj Ponudi (strana 39. Ponude) dostavio Upotrebnu dozvolu broj: 0425-02/01 od 24.02.2021. godine, za radnu mašinu valjak, proizvođača Ammann, Tip ARX 23, izdatu od strane "Protect-ing" d.o.o. Sarajevo. Komisija za javne nabavke cijeni da dostavljena Upotrebna dozvola nije dovoljna kao dokaz, obzirom da je u istoj navedeno da je vlasnik iste firma "MGBH" d.o.o. Sarajevo, što znači da je ponuđač uz istu bio dužan dostaviti i ugovor o najmu, a sve u skladu sa tačkom 7.4.2. pod c) TD.

Zbog prethodno navedenog, a u skladu sa odredbom člana 68. stav 4. Zakona o javnim nabavkama BiH ("Službeni glasnik BiH", broj 39/14) predmetna ponuda je formalno-pravno neispravna i kao takva nije prihvatljiva za ugovorni organ.

II. Ponuda ponuđača "Hik-net" d.o.o Sarajevo ne ispunjava formalno-pravne uslove tražene Tenderskom dokumentacijom i to:

- Tačkom 7.4.1. pod c) TD, a u skladu sa članom 51. Zakona je traženo da ponuđač posjeduje/ima na raspolaganju građevinske mašine i tehničku opremu neophodnu za uspješno izvođenje predmetnih radova, i između ostalog da ima na raspolaganju 1 (jedan) valjak ukupne mase do 3 t.

Tačkom 7.4.2. pod c) TD je između ostalog traženo da se kao dokaz za traženi valjak ukupne mase do 3 t iz tačke 7.4.1. pod c) stavka 5. treba kao dokaz dostaviti važeća saobraćajna dozvola/potvrda o registraciji ili važeća upotrebna dozvola, uz Napomenu II koja propisuje da "Upotrebna dozvola važi 3 (tri) godine od dana izdavanja iste. Ukoliko iz dostavljene upotrebne dozvole nisu vidljive tražene karakteristike mašina/opreme, potrebno je da ponuđač dostavi dokaz-Zapisnik o pregledu mašina/opreme ili drugi dokaz iz kojeg su nedvosmisleno vidljive tražene karakteristike".

Ponuđač "Hik-net" d.o.o Sarajevo je u svojoj Ponudi (strana 42. Ponude) dostavio Upotrebnu dozvolu broj: 03/20 iz februara 2020. godine, za radnu mašinu vibracioni valjak, proizvođača Bomag, Tip BW 100 AD, izdatu od strane "Zavoda za zaštitu na radu" Sarajevo.

Komisija za javne nabavke cijeni da dostavljena Upotrebna dozvola nije u skladu sa traženim dokazom iz tačke 7.4.2. pod c) TD, iz razloga što iz dostavljenog dokumenta nije moguće utvrditi da se radi o valjku ukupne mase do 3 t.

Napomenom II je nedvosmisleno propisano da ukoliko iz dostavljene upotrebne dozvole nisu vidljive tražene karakteristike mašina/opreme, potrebno je da ponuđač dostavi

dokaz-Zapisnik o pregledu mašina/opreme ili drugi dokaz iz kojeg su nedvosmisleno vidljive tražene karakteristike, a što je ponuđač "Hik-net" d.o.o Sarajevo propustio da učini.

Zbog prethodno navedenog, a u skladu sa odredbom člana 68. stav 4. Zakona o javnim nabavkama BiH ("Službeni glasnik BiH", broj 39/14) predmetna ponuda je formalno-pravno neispravna i kao takva nije prihvatljiva za ugovorni organ.

Detaljnim postupkom pregleda i ocjene ponude, Komisija za javne nabavke je utvrdila da ponuda ponuđača "Špic beton" d.o.o. Zenica ispunjava formalno-pravne uslove, odnosno zahtjeve ugovornog organa tražene Tenderskom dokumentacijom.

Zatim je Komisija za javne nabavke pristupila razmatranju finansijskog dijela ponude ponuđača "Špic beton" d.o.o. Zenica, te je izvršena računska provjera dostavljene ponude i utvrđeno je da nema računskih grešaka, a sve u skladu sa odredbom člana 17. stav 1. Uputstva za pripremu modela tenderske dokumentacije i ponuda ("Službeni glasnik BiH" broj: 90/14 i 20/15).

Obzirom da je Ponuda ponuđača "Špic beton" d.o.o. Zenica sa ukupnom ponuđenom cijenom u iznosu od 58.542,00 KM bez uračunatog PDV-a prelazila procijenjenu vrijednost predmetne nabavke koja iznosi 51.000,00 KM bez uračunatog PDV-a, Komisija za javne nabavke je dana 25.05.2021. godine zatražila izjašnjenje od nadležne Službe da li može obezbijediti razliku sredstava u iznosu od 7.542,00 KM bez uračunatog PDV-a za realizaciju predmetne nabavke.

Služba za komunalne poslove se aktom broj: 07-11-625/21 od 27.05.2021. godine očitovala da nije u mogućnosti obezbijediti razliku sredstava iz ponude ponuđača "Špic beton" d.o.o. Zenica i procijenjene vrijednosti nabavke, za realizaciju predmetne nabavke.

Iz navedenih razloga, Komisija za javne nabavke je jednoglasno dala preporuku Općinskom načelniku da donese Odluku o poništenju Otvorenog postupka nabavke radova na izgradnji distributivne gasne mreže na području MZ Vogošća I, u ulicama Krivoglavci I i II (III faza), na području općine Vogošća, iz razloga jer je cijena jedine formalno-pravno prihvatljive ponude za ugovorni organ ponuđača "Špic beton" d.o.o. Zenica, veća od osiguranih sredstava za predmetnu nabavku, a u skladu sa članom 69. stav 2. tačka e) Zakona o javnim nabavkama BiH ("Službeni glasnik BiH" broj: 39/14).

Pouka o pravnom lijeku: Ponuđač koji je učestvovao u postupku nadmetanja može radi zaštite svojih prava, u roku od deset dana od prijema Odluke o poništenju postupka nabavke izjaviti žalbu. Žalba se podnosi Uredu za razmatranje žalbi BiH putem ugovornog organa.

Izradio: Mirza Čutura

Mirza Čutura

Kontrolisala: Melisa Kršo

Dostavljeno:

1. "Musić company" d.o.o. Sarajevo
2. "Špic beton" d.o.o. Zenica
3. "Hik-Net" d.o.o. Sarajevo
4. Nadležnoj Službi
5. U dosije
6. a/a

nedimdupovac@hotmail.com

032/456-147

033/436-860



OPĆINSKI NAČELNIK

Edin Smajić
Edin Smajić